

MALINCUNIA

Iu, a mia
malincunia mi cogghi
se tu mi manchi,
se tu ccà sulu a mia mi lassi,
se tu, spizziusa sulidda,
rumani, ccà, prestu, nun t'arricuògghi.

E amaru è 'u ma cori
se veni ca chissa mi 'ncagghia ,
se ora,
comu 'na carrabbinera
'a manu, lesta, mi pigghia,
e ora
'a catina ô peri m'amprugghia
e mi spogghia
rô cori e râ menti
la paci.

Ma tu torna,
e 'i pila mi lievi râ lingua
e ti parru e mi parri
e mi lavi l'amaru nô feli
e lassi
ca 'u russu ranatu mi cuògghiu
e mi 'lliccu l'aruci rô meli
e 'u scuru ri l'uocci m'addumi
e iu 'u sciatu ti sciusciu
e ciercu e cci truovo
nô cori e nô menti
'a spranza
ca torna rumani
'a vita ri prima
com'era.

E iu criru,
e tu 'u pienzi e tu 'u sai,
ca iu campu
ppô riestu rê jorna e râ vita
sulu
e iu 'u sientu
nô risu e nô ciantu,
cu tia cumpagna sulitaria,
chista mia malincunia.